



客語文短篇小說 社會組

評 審 感 言

黃子堯

這擺客語短篇小說社會組有 16 件作品來參加比賽，數量係較豐富个一組。參賽作品表現主題較多，從內容來看，有抒情个記錄，有懷舊、惜情个感嘆，有面對時代變化帶來个感念，看得出作者个用心經營，想愛呈現盡有意義个故事情節，評審都認為描寫个功夫多元又生動，客語應用也已熟絡，投稿作品个可看性有一定个水準。

經過評審个評分摺討論，決定第一名作品係〈像種〉，一篇充滿思念、懷想又對感情轉折講話个小說作品，代代相傳个精神出現一種反諷性个質疑，寫實文字運用相當深刻流利。第二名作品〈徙屋〉，從結婚開頭，寫出成家、買屋、親友人物个對話摺回應，表示出現實生活轉換个情思，係平實个寫作方法當中有較好表現个題目。第三名〈有閒時節唱山歌〉，用一個代班音樂先生个情景，寫出山歌班教學個內容同人身个轉變過程，包含了客語親切个運用，同時將客家歌謠個發揮摺展現顯現出來，達到文史教育个味緒，讀起來有滌滌个情義，但係這篇作品較接近散文式个描寫，文學小說書寫个功夫較弱。

透過客語文學个進展，創作優美个小說文學，投稿參加比賽，做得加強煞猛練習个功夫，探討過較多个表現題材摺形式，應用客話寫出越來越多、越來越好个文章來。

好个作品十分難得，恭喜所有得獎个作品。